

Pengeluaran daging tempatan hanya 25 peratus

UTUSAN MALAYSIA 13/9/2017 p.17

KUALA LUMPUR 12 Sept. - Pengeluaran daging lembu tempatan hanya sebanyak 25 peratus berbanding permintaan keseluruhan dalam negara yang terpaksa bergantung kepada bekalan daging import.

Pengarah Institut Pertanian Tropika dan Sekuriti Makanan Universiti Putra Malaysia (UPM), Prof. Dr. Zulkifli Idrus berkata, industri ternakan lembu tempatan perlu dipertingkatkan bagi membolehkan ia memenuhi permintaan dalam negara dan mengurangkan jurang import tersebut.

Menurutnya, dengan hanya



ZULKIFLI IDRUS

mampu menghasilkan 25 hingga 28 peratus pengeluaran daging tempatan, negara perlu memenuhi permintaan bekalan dengan mendapatkannya dari negara luar terutama Australia dan India.

“Namun daging yang diimport dari India adalah daripada jenis daging kerbau yang kurang berkualiti jika dibandingkan dengan daging lembu tempatan walaupun harganya jauh lebih rendah.

“Selesa dengan harga rendah itu juga antara faktor mengapa negara masih lagi terus mengimport daging dari luar walhal kita mampu meningkatkan pengeluaran daging lembu tempatan,” ka-

tanya kepada *Utusan Malaysia* di sini hari ini.

Awang Selamat menerusi tulisannya dalam *Mingguan Malaysia* sebelum ini membangkitkan kewujudan kartel pengimportan daging sekali gus menyebabkan industri itu dimonopoli oleh golongan tertentu.

Mengulas lanjut kata Zulkifli, negara tidak boleh berterusan bergantung kepada daging import dan harus mempunyai pelan untuk mengeluarkan makanan sendiri.

Justeru katanya, pihak swasta perlu memainkan peranan menceburi bidang ternakan bagi membolehkan transformasi industri itu dapat dipertingkatkan kerana memberi pulangan yang lumayan kepada pengusaha.